

備倭圖記
構李記
備邊屯田車銃議
倭情屯田議



備

倭

圖

記

卜大同輯

中華書局

叢書集成初編

備倭圖記（及其他三種）

中華書局出版發行

（北京王府井大街三十六號）

秦皇島市資料印刷廠印刷
一九九一年北京第一版

開本：七八七乘一〇九二毫米 三十二分之一
統一書號：ISBN7-101-00894-1/K·367

叢書集成初編所選
稗海唐宋叢書皆收
有此書唐宋本僅收
一卷稗海爲足本故
據以排印

備倭圖記序

大瀛海環其東南。有倭夷焉。以島爲居。以舟爲馬。習刀鋌以抄略。其天性也。又我民類多滑豪。潛與夷構。相爲雄長。至如炎風去。如收電奄。忽千里。縱橫茫洋。往往入盜於海邊。不可勝數。民甚患之。茲余持節閩中。職司海禁。迺日夜思竭其不肖之才力。務一心營職。以求底于肅清也。願書生不知兵。又其積弛已非一日。則亦何能爲焉。所賴者。上而督府洞察機宜。式勤遠略。下而師帥同心靖寇。戮力効忠。以故閩海稍稍安寧。亡萌釁之作矣。夫舟師之設。亦軌事之大者也。而今多失其故實焉。豈所以跨海內。制倭夷之術哉。然惟治理廢興。雖以古今時變。所貴載在方冊。有明徵焉。是俾後之人得以按籍而修其政也。迺不自揆。紬繹見聞。再證履討而爲之圖記云。

備倭圖記目錄

海圖

士卒

邊儲

置制

烽堠

奏牘

方畫

險要

將領

戰舸

陳眉公訂正備倭圖記

明 卜大同吉夫輯

置制

晉置溫麻船屯。

唐置左衛營、右衛營。復置經略寧海軍。唐末，陳巖置九龍軍。僞閩置龍虎天霸等六軍。及控宸、控鶴、宸衛三都，以自衛。迄于五季，有全勝、百勝、橫衝、海路、捉生、護閩諸營。

宋置崇節水軍，牢城外則自京或他路更番屯駐。慶曆中，增置澄海。嘉祐初，併爲威果。熙寧中，改爲教閱廣節，不教閱保節。元豐中，置壯城及諸寨。紹聖間，罷遣戍兵，置有馬雄略。大觀元年，升帥府，置全捷。紹興初，福州置荻蘆、延祥二寨。泉州有水灣寨。乾道八年，始置。後改名永寧。今爲永寧衛。淳熙十三年，統制韓俊，請復于城南中里置寶林寨。城東十五里，置法石寨。嘉定十一年，海寇衝突，圍頭守真德秀，以寶林帶郭，法石控海道，請增法石兵，而移寶林兵戍圍頭，立寶蓋寨。其正將衛立于法石，諸屯並聽命焉。若漳州之中柵寨，則在龍溪中柵。沿海寨，則在漳浦南詔塢。今爲詔安縣。其寧海寨，在海口鎮外豪門。蓋紹定二年，漳守李勳請建也。

國朝洪武二十年，江夏侯周德興經略沿海地方，設立福寧、福州、左福州、右福州、中鎮、東興化、平海、泉州、永寧、漳州鎮海一十一衛。大金定海、梅花、萬安、蒲禧、崇武、福全、金門中、左高浦、陸鰲、銅山、玄鍾一十三所。

大箕箐清澗高羅延。白石東洋麻嶺北。菱五虎門。閩安鎮石梁焦山小社松下。澤郎牛頭門壁頭迎仙。冲沁青山。嵌頭吉了峯。尾黃崎小岬。獼猴祥芝深。滬烏滄園頭官灣田浦峯上。陳坑烈嶼塔頭高浦濠門海門。烏尾井尾青山後葛古雷金石洪淡。四十四巡司。永樂年間復設烽火。南日。浯嶼三水寨。正統初年侍郎焦宏以其孤懸海中。迺徙烽火於松山。南日於吉了。浯嶼於嘉禾。各仍以舊稱。又設小埕銅山二水寨。銅山在井尾地方。至景泰二年。尙書薛希璉又將井尾官軍移遷于銅山西門灣後。又以銅山水寨南哨改爲玄鍾灣。仍屬寨轄焉。而安邊館則始自嘉靖七年。都御史胡璉選委各府佐理其事。今都御史王忬又於流江官井洋松下閩安鎮連盤滬洲泥滬獼猴園頭料羅玄鍾各設遊兵船云。

方畫

自福寧州流江以南至羅源縣濂門約五百里。則以烽火水寨轄之。自濂門以南至福清縣牛頭門巡檢司約四百里。則以小埕水寨轄之。自牛頭門以南至晉江縣祥芝巡檢司約五百里。則以南日山水寨轄之。自祥芝以南至漳浦縣井尾巡檢司約四百里。則以浯嶼水寨轄之。自井尾以南至詔安縣洪淡巡檢司約三百里。則以銅山水寨轄之。自洪淡以南至廣東柘林寨約一百里。則以玄鍾灣轄之。蓋所謂信地云爾。

將領

晉有典船校尉。唐經略寧海二軍以刺史領之。宋有安撫司兵官。福建路兵馬副總管。按宋史每路委文臣一員充撫使以

治民。武臣一員。充都總管以治兵。又按三山志。福建路只有都總管一員。以路分鈐轄爲之。後爲路分鈐轄。福建路兵馬鈐轄一員。說見宋史。路分都監。掌本路禁旅屯戍。防禦訓練之政令。以肅清所部。又按三山志。元豐後。福州名立路分都監一員。福州建寧府駐將二員。劉各一員。延祥寨水軍正副統領各一員。准備將提轄官訓練官指教官錢糧官各二員。荻蘆寨水軍統領兼福州興化軍都巡檢使一員。緝捕官一員。准備將領二員。中柵沿海海口巡檢各一員。國朝衛所有指揮千百戶。巡司有巡檢。凡水寨。統以把總指揮。而各衛所歲輪指揮千百戶。各以其軍往聽節制焉。正統間。巡撫侍郎焦宏奏改都指揮五員把總。又奏選都指揮一員。張藎提督浙廣東海道。正統五年。御史成規奏革三省海道。除都指揮僉事王勝提督福建備倭。景泰四年。巡撫尙書孫原貞奏革各水寨把總都指揮。只委指揮五員把總一□一更。其把總指揮五年一代。則弘治十三年依太監鄧原請也。若玄鍾湧之守備。亦以指揮充之。而各要害遊兵官。則指揮千百戶雜用。嘉靖三十一年七月。兵部又奏設參將一員。領勅握符。分守福興泉漳地方云。

士卒

宋澄海軍五百人。後改威果。增爲五百一十人。全捷軍額如之。教閱保節軍五百人。後改除教閱二字。改名廣節軍。每指揮不得過五百人。壯城軍二百三人。延祥軍一千人。荻蘆軍五百人。中柵沿海俱一百六人。寧海則七十人。

國朝衛統五所。各軍一千人。共五千人。其五寨一湧。烽火則福州左中福寧。共撥軍四千六十八人。今逃

亡者三千人。小堤則福州右鎮東梅花萬安定海。共撥軍四千四百二人。今逃亡者二千三百八十三人。南日則泉州興化平海共撥軍四千七百人。今逃亡者二千五百五十七人。浯嶼則永寧福金門崇武共撥軍三千四百二十九人。今逃亡者一千四百六十八人。銅山則鎮海陸鰲玄鍾共撥一千八百一十二人。今逃亡者一千一百九十二人。玄鍾則漳州鎮海銅山共撥一千一百三十三人。今逃亡者四百七十八人。成化間都御史張瑄欲軍得以休息分作三班。上班今年二月上。明年二月下。下班替之。中班今年八月上。明年八月下。上班替之。下班明年二月上。後年二月下。中班替之。參差輪轉。大約一年有半年休息。休息者月辦料銀一錢。以修戰舸。後又於出海者選退老弱。每人扣行糧四斗。月糧三斗。以待募兵之用。

烽墩

烽火界內二十有四。曰黃崎。曰水灣。曰後崎。曰大青。曰浩東壁。曰黎智。曰白露。曰南鎮。曰沙堤。曰梅花。曰金家降。曰南金。曰小箕簍。曰大箕簍。曰古縣。曰青山。曰塔尾。曰閭峽。曰羅浮。曰長門。曰石湖。曰車安。曰關崎。曰赤崎。小堤寨界內五十有三。曰鴈塔。曰埤寨。曰峯頭。曰崎達。曰黃崎。曰格上。曰安海。曰官塢。曰蛤沙。曰小灣。曰東岸。曰石鼓。曰六石。曰浪頭。曰恭山。曰魁洞。曰湖井。曰聖娘。曰牛山。曰下嶼。曰蕉山。曰鱗鮮。曰斗湖。曰黃崎。曰大亮。曰可門。曰大坵。曰小址。曰峯前。曰白鶴。曰江田。曰流水。曰澤朗。曰西松。曰崎山。曰後崙。曰石濃。曰西坑。曰大朗。曰後營。曰茶林。曰汶溜。曰桃嶼。曰仙巖。曰前晏。曰塔山。曰馬頭。曰倘頭。曰石馬。

曰陳塘。曰蒲頭。曰雙嶼。曰峯頭。南日寨界內二十有一。曰蟺前。曰石獅。曰小灣。曰石井。曰蔡山。曰石城。曰崎頭。曰澄港。曰湖邊。曰埕口。曰新浦。曰三江。曰山柄。曰山西。曰文甲。曰大頭。曰東湖。曰大岬。曰青山。曰古雷。曰赤山。曰嶺寨界內四十。曰沙堤。曰古雲。曰東店。曰龍婆。曰深爐。曰東埔。曰浯沙。曰總臺。曰五通。曰井上。曰龍淵。曰東灣。曰徑山。曰東渡。曰廈門。曰流礁。曰牛頭。曰洪山。曰天寶。曰歐山。曰西山。曰葉亨。曰穢林。曰東門。曰坑山。曰洋下。曰陳坑。曰安平。曰石頭。曰石蘭。曰肖下。曰益埔。曰潘徑。曰瞭臺。曰西爐。曰亨泥。曰劉山。曰馬鑾。曰大員堂。曰歐舍。銅山寨界內十有七。曰莆頭。曰灣角。曰燈火山。曰白塘。曰江口。曰流會。曰小灣。曰卓岐。曰大逕。曰瞭望臺。曰陸鰲。曰峯山。曰安集。曰洪坵。曰古樓。曰陳平。曰泊浦。玄鍾灣界內七。曰瞭臺。曰南山。曰洋林。曰鹽倉。曰黃崎。曰漸山。曰東灣焉。要皆使民得以知寇至而爲之備也。

險要

崙山。流江水灣。釣灣。秦嶼。三沙。閭峽。官井。洋古鎮。門濂。灣門。是爲烽火要害。上竿塘。下竿塘。棕蓑山海壇。山濂。灣梅花港。磁灣。松下。是爲小埕要害。湄洲。唐南日。即南日。烏坵。石獅。雙嶼。青山。南哨。泥瀝。文甲。張坑。大岬。是爲南日要害。大担。舊浯。嶼。梅林。圳上。圍頭。白沙。料羅。金門。烏沙。曾厝。安南。風灣。是爲浯嶼要害。沙洲。橫嶼。油潭。靈宮。前。是爲銅山要害。南灣。山走馬溪。傳厝港。是爲玄鍾要害。於此而嚴以守之。斯賊不敢侵軼矣。

戰舸

宋嘉祐三年。知福州蔡襄奏。福興。泉漳。各有魴魚船及巡檢司船。乞修整以備海道。乾道二年。令諸司分

甲乙丙番品搭以備調遣。其後泉州沿海晉江同安南安惠安四縣分甲乙丙三番計二十一隻。甲番一隻乙番九隻丙番二隻。遞年行下屬縣拘集以聽安撫司起發。淳祐三年安撫司乞措置沿海諸州民船挑類丈尺重立番次有旨令安撫司措置團練。淳祐九年漳州守章大任造巨鵬巨鰲二船。荻蘆寨有巨舟曰赤馬賊遇之必遁。

國朝沿海衛所每所設備倭船十隻每一衛五所共船五十隻。船有虧拆有司補造損者軍自修理蓋載在會典云今則不復修舉矣。

邊儲

衛所塞灣官軍糧餉。先年布政司會計應支之數於福興泉漳福寧各府州所屬縣秋糧併各衛所屯糧。潯美等場鹽米及延建汀邵等府秋糧派撥湊補。後因官軍減耗正德十五年會計見在官軍俸糧定派倉額足穀支用。遂將延建等府撥補錢糧止作糧剩解司貯庫。而福興泉漳等府州派撥之餘亦有糧剩解司歲或大侵及舉賢斂材之費皆取足於斯焉。然已非其實矣。故以計軍實則日見其少以覈軍餉則不見其多也。爰記顛末俾事事者有考焉。

奏牘

申樞密院措置沿海事宜狀

真德秀

照對泉之爲州控臨大海實閩陬要會之地國家南渡之初盜賊屢作上勤憂顧置兵立戍所以爲海道

不虞之備者。至詳且密。開竊軍興之卒。戍卒生還者鮮。舟楫蕩不復存。於是武備空虛。軍政廢壞。有識之士。所共寒心。近者溫明羣盜。窺見單弱。輒萌侵軼之志。仰賴聖朝。威德廣被。亟遂肅清。儻幸目前之警。和平。因循苟簡。不復少加經理。安知其亡後日之患。某不揆迂愚。竊思所以爲久安之計者。近選委本州觀察推官李方子。知晉江縣徐叔用。同左翼軍副將丘全等。徧行海濱。審視形勢。今據遂官中。竊見沿海列戍。要在控扼得所。布置得宜。士卒精練。器械整齊。舟楫便利。而又習熟風濤。然後緩急可用。今來左翼水軍三寨。曰寶林。曰法石。曰永寧。本州沿海四寨。其緊要者二。在晉江曰石湖。在惠安曰小兜。雖已得控扼之數。然寶林取城甚近。距海殊遠。其勢稍緩。而迺有新舊兩寨。至圍頭。去州一百二十餘里。正闕大海。南北洋舟船往來必泊之地。旁有支港。可達石井。其勢甚要。而前此未嘗措置。此控扼之未盡得其所也。寶林所屯水軍三百。其數爲多。法石雖有一百二十餘人。然正爲防海要衝之地。其數尙少。永寧步軍之數。倍於水軍。誠爲倒置。此布置之未盡得其宜也。諸寨軍兵。雜以老弱。法石軍器。總於大軍。遇事關請。未免稽遲。大軍戰艦。僅可足用。自餘諸寨。船隻俱無。徒有舟師之名。初無其實。至於營房倒塌。器械闕少。亡具尤甚。若不及今逐一整備。臨時必至誤事。今條具合行措置事件下項。須至申聞者。

申樞密院乞修沿海軍政

前人

戰船南遁。未盡就擒。風濤瞬息。往來無時。某昨守本州。自捕賊首趙希卻之後。具申朝廷。蒙發度牒十五道。應副本州修整戰船。創立圍頭寶蓋。及修葺法石。永寧二寨。添屯水軍。增置石湖。小兜水軍名額。以

至儲蓄軍糧。葺理器甲。色色具備。每歲舉行水教。及立諸寨。巡海界分。今再至。見逐項事多廢弛。軍船壞爛而不修。軍額死亡而不補。營房頹墜。器甲損失。自統制齊敏到官。方稍繕治。尙未能就緒。及至賊船侵軼郡境。倉卒和僱民船。應副大軍之用。故料羅之戰。雖有勇將精卒。竟以船小。不能成全功。及晉江同安。民船稍集。而賊徒亟遁。事已無及。今賊徒深入廣南。正當船回之時。必有遭其剽劫者。豈不虧失國課。又福泉興化三郡。全仰廣米以贍軍民。賊船在海。米船不至。軍民便已乏食。糴價翔貴。公私病之。其爲利害。固已不細。況其在海。每劫客船。小則焚之。大則取而爲己之船。其人或與鬪敵。則殺之。懦弱不堪用。則縱放之。或沉之水中。而擄其強壯。能使船者爲己之用。稍忤其意。輒加殺害。故被擄之人。只得爲出死力。其始出海。不過三兩船。俄卽添至二三十隻。始不過三五十人。俄卽添爲數百以至千人。今諸賊在海。人船已多。若不及早殄除。則日增月益。其害未有窮已。某見與統制齊敏商議。懇促水軍。及添創大船。葺理諸寨。務爲先備。使賊不敢犯。但本州目今府庫亦立。官俸軍糧。尙且不給。而本軍見管典庫息錢。亦自不多。俟旦夕見得合支用錢數。或有久闕。未免控告朝廷。乞賜量行應副。所有福州延祥。荻蘆寨。廣州摧鋒軍。及漳潮州興化軍。應有水軍去處。欲望指揮行下各處。急速措置。修創船隻。閱習事藝。向去南風。賊船必回向北洋。若自廣至福。所過五六州軍。處處有備。會合剿捕。庶幾可以殄滅。免爲海道無窮之害。乞賜指揮施行。

臣契勘廣南福建路。近年多有海寇作過。劫掠沿海縣鎮鄉村及外國海船市舶司上供寶貨。所得動以巨萬計。官司不能討捕。多是招安。重得官爵。小民歆豔。皆有倣效之意。臣恐自此爲患未艾。蓋緣兩路帥司並無戰艦水軍。遇有海寇。坐視猖獗。不能進討。止是於沿海擺布些小兵卒。爲保守之計。賊船來去。近遠不常。並海之民。罹其荼毒。擄掠船舶。既多。愚民嗜利喜亂。從之者衆。將浸成大患。如晉之孫恩。不可不遏。爲之備。伏望聖慈。特降睿旨。常存兵於兩路鎮壓。仍下逐路帥司。委以措置戰艦。招集水軍水夫。常切教閱。令士卒習於風濤之險。以水夫駕舟。以官軍施放。雖賊糧飄忽。可以追逐掩擊。殄滅一兩頭項。則餘人有所忌憚。不敢覬覦妄作。庶幾海邦之民。得被朝廷大賜。不勝幸甚。

奏革巡海參政專管糧儲疏

成化九年。兵部爲添設管糧官員事。職方清吏司案呈。准吏部文選清吏司手本。奏本部連送該本司案。呈奉本部送吏科抄出巡撫福建都御史張題。照得廣東海道。止添設巡海副使一員。今福建與廣東海道連接。事體相同。既有巡海副使。協同備倭。都指揮。足任海道之事。又添設巡海參政。似爲冗員。合無將巡海右參政陸昶。照兩廣事例。請勅專管糧儲。巡察邊務。福州府添設管糧通判一員。庶得官無濫設。糧得易完等因。具奏。奉聖旨。該部知道。欽此。欽遵。抄出到部。送司案呈。看得右副都御史張題稱。要將福建巡海右參政陸昶。改任管糧。巡察邊務。及福州府添設管糧通判一節。緣巡海管糧。係戶兵二部掌行。合就連送該司。仰用手本前去戶兵二部。該司呈堂查照施行。連送到司。合用手本前去兵部。該司依文。

施行。手本到司。案查先該吏部等衙門會官議奏。各司府州縣額外添除官員。事簡官多者。俱令裁革。已將福建巡海右參政李顯裁減別用。續該鎮守福建馮讓等題稱。要照舊添設參政副使等官。本部爲照布政司參政難再添除。已經具題行移吏部。添除副使一員。請勅令去福建會同總督備倭官員。專一巡視海道去後。續該福建左布政使姚龍等奏稱。福建海洋闊沿海永寧等倉。積弊尤甚。布政司雖有額設布政參政參議共七員。除本司掌印管事。其餘公占數多。委實缺官。提督海道總理湯儲。乞照舊添除參政或參議一員。前來管理等因。本部爲照福建地方。委的海洋廣闊。海寇不時出沒。今既本司官員公占數多。若不與其區處。恐後因循誤事。合無准其所奏。行移吏部。添除參政一員。請勅前去巡視海道。兼理倉糧等因具題。奉聖旨是。欽此。欽遵外。緣右參政陸昶。係奉勅巡視海道。兼理倉糧官員。已有前項奉准事理。難以輕易更張。合就移咨貴部。煩爲知會施行。

議革巡海右參政疏

弘治七年。爲修省事。該巡按御史陸完題稱。照得福建布政司添設巡海兼管糧參政一員。蓋因先年沿海地方。事勢可慮。所以既設有備倭都指揮僉事。又於布政二司添設參政副使管理。今賴朝廷威福。海上頗寧。雖盜賊出沒。脫或有之。然旋發旋獲。無甚大患。以一備倭都指揮節制其軍馬。以一按察司副使糾察其奸弊。若肯用心。事無不理。所有巡海參政。誠可革也。其兼糧儲。先該鎮巡等官奏准事例。於布政司見任官員內。自右布政以下。公議一員。專一管理所屬一應糧儲。不許干預別事。本司一向於右布政

以下照例□委。近因巡海右參政魏瀚。本勅兼管糧儲。所以通省糧儲。俱是本官帶管。但本省地方建延邵汀四府。相去福寧泉漳沿海府分。遠者半月以上。近亦不下數日。本官因爲海道牽制。終歲不能親臨。況各分守官員。又見自有職掌。催督不嚴。致使一應糧儲。反加遲誤。所有巡海管糧。不可兼也。從今計議。合無將巡海兼管糧參政革去。一應海道事務。如操點官軍船隻器械。督捕海賊。稽考倉糧之類。俱責成於巡海副使。凡遇進表等項公差。不許承委。以致海道缺官。其通省糧儲。不必委官專管。但責成於分守官員。專一往來催督。不許分外濫受詞訟。有妨本等職業。如此。則官無冗濫。民省供給。而政務亦無不舉。但邊海地方。今雖頗寧。又恐忽然有警。或致誤事。彼時議者。不思今日官多無益。惟稱管理缺人。此則未然而慮。非臣知識所能預料。伏望聖明裁處。該吏部尚書耿 等覆題。奉聖旨是。

議五寨把總五年一換及巡海總督備倭更番出巡疏

弘治十三年。少保兼太子太傅兵部尚書臣馬 等謹題。爲處置邊務事。職方清吏司案。呈奉本部。送於內府。抄出鎮守福建御馬監太監鄧原題。查得福建沿海地方。先於洪武永樂年間。設有烽火門。南日山。浯嶼。三水寨。調撥各軍衛所官軍。設立墩臺船隻。每寨委指揮一員。把總管領。專備倭寇。正統初年。海寇生發。該巡撫焦侍郎奏添銅山。小埕。二水寨。共設立五水寨。委都指揮五員把總。又奏選都指揮一員。張義領勅前來提督浙江廣東福建三省海道。往來巡視。正統五年。巡按監察御史成規。奏准革去三省海道。除都指揮僉事王勝。領勅前來提督福建備倭。景泰四年。巡撫福建兵部尚書孫原貞。奏准革去各水